

李文襄公別錄

李文襄公別錄卷之三

軍旅紀畧

右司道府飭勵官常

行藩臬二司查取官員劣蹟

飭金衢道府廳縣拏散創逆犯

飭杭嘉湖道申嚴防範機宐

飭寧紹道府廳縣緝拏賊黨

飭溫處道府守禦地方

飭金衢道府守禦地方

飭寧台溫紹杭嘉湖各道府守禦地方

飭金衢道確探閩逆情形

飭杭嘉湖金辰各道府預辦糧料

飭仁和錢塘知縣嚴保甲護奸宄

飭各道察拏奸宄

檄布政司預給兵丁糧餉

飭金衢道府備辦糧料安撫居民

飭溫處道府嚴催大荆邊海整餉

獎勵寧紹道府廳縣

飭驛道整理夫船馬匹

檄布政司酌議軍需

檄查勒收草豆使費

檄布政司驛糧二道趲運軍需

飭杭州知府查解兵廝騷擾浙西鄉村

檄溫處道嚴禁掠販難民子女

飭按察司嚴肅秋闈

飭金衢溫處嚴台各道府撫集流亡

發銀行府中元薦度陣亡將士

檄委杭嚴道隨軍招撫

飭西安知縣撫輯新復地方

飭衢州知府查勘賊遺砲械

飭同知楊道泰赴江山縣協辦軍務

飭江山知縣招撫馬勝家屬

飭金華知府乘時招撫

飭處州知府乘時撫輯

飭龍游知縣乘時招撫

飭湯溪知縣乘時招撫

飭江山知縣查議給還婦女

飭溫處道隨軍整理處屬恢復六縣

檄委金衢道隨軍招撫

檄委台巡道撫輯溫郡餘寇

飭龍泉宣平遂昌各知縣撫綏地方

飭開化知縣齋諭招撫程鳳

飭江山縣看養廣信難婦俟領完聚

牌給生員盛鼎招撫

查釋閩省歸浙難民子女

飭禁司道府廳州縣差擾

飭司道各府嚴禁害民諸弊

飭各道查訪衙蠹

飭司道嚴查縱盜諱盜積害

飭按察司禁止酷刑

檄杭嘉湖道亟議靖盜安民六條

檄衢州道府縣愛養衛屬黎民

李文襄公別錄卷三

男 鍾麟編次

行司道府飭勵官常

康熙十二年十月

爲飭勵官常以肅吏治事照得安民必先察吏大法  
然後小廉蓋以吏治之臧否民生之休戚係焉本部  
院素知浙省頻年災戢民生困瘁全賴良有司撫綏  
愛養漸起凋疲乃其間黽勉從事克修厥職者固不  
乏人而簞簋不飭尸位負乘者亦比比皆是如徵收  
錢糧則額多火耗審理詞訟則庭有冤民或縱容衙  
役以生事或聽信情面以徇私甚至賄賂通行是非



顛倒本部院持憲長安早知大概今膺

簡命節制是邦必期力清積弊以挽頽靡凡此董率羣僚  
凜持廉法惟各方面官是賴尤當秉公執法不得瞻  
顧因循本部院當茲叱馭伊始姑行嚴飭以觀自新  
爲此牌仰該司道府官吏照牌事理即便遵照嗣後  
務須持廉秉公恪勤乃職并轉飭所屬潔已愛民奉  
公守法倘有政績勤敏操守無玷者本部院不靳特  
疏薦揚以昭激勸倘仍溺職敗檢貪黷乖張本部院  
惟有白簡從事斷不姑徇以貽一路之哭各宜凜遵  
慎無嘗試

檄行藩臬二司查取官員劣蹟

康熙十三年正月

爲查取不職官員劣蹟以肅吏治事本部院欽承

簡命總制全浙下車之後例有入境糾叅浙省地處衝繁  
災禳之餘民生困瘁已極所望以澄清吏治拊循地  
方惟監司守令是賴若乃貪殘不法職業全隳置民  
瘼於罔聞惟苞苴之是問旣已有玷官常亟宜立登  
白簡合行查取爲此牌仰該司照牌事理卽將通省  
道府廳縣各官逐細查訪有溺職敗檢穢跡昭彰者  
備開贓款劣蹟限文到 日內密揭呈送本部院以  
憑覆核糾叅至於察訪之法務須持廉秉公勿瞻徇

情面勿畏勢市恩勿寬大吏而以卑員塞責勿舍貪  
酷而以微疵黜級款犯必實有其人不許暗捏詭名  
以畱展轉之地事蹟必詳列月日不得游移朦混以  
開出入之端該司職任綱紀見聞必確萬毋寬縱其  
劣狀大著爲害地方之官本部院已經密訪直確寫  
記於此若不據實指揭亦卽特疏  
題叅該司難辭徇庇之咎慎毋違錯

檄飭金衢道府廳縣密拏散割逆犯

康熙十三年三月

爲密報出首偽割事據金華府東陽縣詳報內稱逆黨單于郭美之王彥俞造割散布肆行煽惑卑職設法密按令施應驪盧魁甫騙割出首一面差兵快緝拏先將出首狀詞口供并抄偽割具文密報等因到本部院據此爲照浙省地方久經寧謐何物奸徒輒敢散布偽割煽惑人心大干法紀合行密拏審究爲此牌仰該道府廳縣查照牌內事理即便密拏散割逆犯單于郭美之王彥俞到官嚴究確審雕印散割情形并起獲偽割及根究逆黨數目的確姓名住址

一併密拏審解務盡根株毋使滋蔓一面清查保甲  
加謹防備毋得疎虞慎速慎速

檄飭杭嘉湖道申嚴防範機宜

康熙十三年三月

爲申嚴防範機宜以固疆圉事照得浙省爲海疆重  
地杭嘉湖尤爲劇郡衝繁外防海寇倭邊內慎萑苻  
肅聚必須有備始可無患况邇來逆氛多警愚民惶  
惑保無飢寒不軌之徒結聯釀害則思患預防正宜  
綢繆早計該道案具宏猷凡地方形勢如何設防山  
海要隘如何戍守砲火作何整頓墩臺作何修葺以  
及內地遊巡邊方瞭哨一應機宜皆當會商妥確合  
行申飭爲此照仰該道照牌事理卽查該道所屬地  
方如嘉郡平湖海鹽逼近海濱近聞塘報時有一二

賊艘游移則當相度情形確酌隘口何處添兵何處  
守禦嚴飭臺兵勤加瞭哨其餘嘉秀各縣以及杭湖  
二府屬或支港濠紆錯雜或地當南北衝衢如太湖  
巨浸夙稱盜藪近雖設兵駐守稍爲斂跡如杭郡省  
會根本重地雖設重兵彈壓而其間山鄉水澤奸良  
混雜邪正莫辨更當嚴查保甲稽詰奸宄無使容隱  
滋擾三府砲位安頓處所應需火藥砲架砲蓬等項  
應請給者速行詳議請給應置辦者速爲設法置辦  
一應道路橋梁速飭該地方官預爲修築完固毋致  
臨事周章并一應未盡事宜星速會同各府營將商

議妥確因地制宜相度籌酌料理停當具文詳報以憑酌度毋得玩忽



檄飭寧紹道府廳縣緝拏賊黨

康熙十三年三月

爲報聞事據紹協副將報稱蕭山縣七八都地方賊首朱玉華朱元甫等煽誘愚民嘯聚釀亂被保正報縣拏獲審供緣由到本部院據此爲照浙省地方久經寧謐惟有紹屬蕭山諸暨等處旣在崇山疊嶂之鄉復處水陸交通之地夙稱盜藪最易叢奸况近日邊方多警民心惶惑誠恐飢寒不逞之徒鋌而走險招誘亡命流突鄉村先經本部院申飭防範嚴行稽詰毋許怠忽貽患節次告誡在案今據報賊首朱玉華糾集已獲之李啓元等輒敢糾聚謀亂釀害地方

合亟嚴拏審究爲此牌仰該道府查照牌內及黏抄  
事理立提已獲賊犯會同確審嚴究倡亂起事真情  
賊黨的確數目姓名住址一併密拏審解一面將逃  
匿未獲各賊遴差兵快廣偵密拏并預行知會鄰近  
縣汛一體協力擒拏追緝務盡根株毋使滋蔓亦不  
得混捉良民濫及無辜一面嚴查保甲相度險要加  
謹防備毋得玩誤疎虞密速密速

飭溫處道府守禦地方

康熙十三年三月

爲飛飭守禦地方事康熙十三年三月二十九日據溫州鎮塘報內稱靖藩變亂緣由到本部院據此爲照浙閩接壤據報閩省兵變溫屬最爲密邇隨即飛飭平陽鎮躬統官兵前往分水關一帶堵禦并檄調溫州鎮瑞安營官兵聯絡接應外合行知照防範爲此牌仰該道府照牌事理即便分派守禦城垣稽察奸宄措辦糧餉接濟軍馬聽候本部院酌調官兵齊集星赴仍不時哨探情形飛報本部院以憑調度事關軍機毋得遲誤

飭金衢道府守禦地方

康熙十三年三月

爲飛飭守禦地方事據溫州鎮塘報內稱靖藩變亂緣由到本部院據此爲照閩省兵變衢屬最爲密邇且仙霞關又係浙境險隘隨卽飛檄衢協副將躬統官兵前往仙霞關小竿嶺一帶守禦外合行知照防範爲此牌仰該道府照牌事理卽便會商衢協一面速據險要固守關隘一面分派守禦城垣稽察奸宄措辦糧餉聽候本部院另調官兵齊集星赴仍不時哨探情形飛報本部院以憑調度事關軍機毋得遲誤

飭寧台溫紹杭嘉湖各道府守禦地方

康熙十三年三月

爲飛飭守禦地方事照得閩省叛變浙境壤連水陸  
交衝在在自宜嚴防本部院據報隨即調發滿漢官  
兵前往衢州大路堵禦并行附近鎮將統兵扼守險  
要本部院與

提督隨即相繼進發酌量調度外但閩省既經倡亂  
勢必結聯海寇濱海地方務宜加意防範用保無虞  
合行飛飭守禦爲此牌仰該道府照牌事理即便會  
同城守營弁固守城池稽察奸宄修葺城垣措備糧  
料接濟兵馬嚴飭沿邊加意巡防倘有賊踪驟突一

面飛報本部院軍前調度一面協力堵禦仍將情形  
不時飛報毋得怠忽

飭金衢道確探閩逆情形

康熙十三年三月

爲確探緊急軍情事照得閩省兵變本部院見據溫州鎮飛報隨即調發官兵分守要隘相機堵禦但衢郡與閩境接壤其閩省倡亂情形何未據該道報聞合行申飭確探爲此牌仰該道照牌事理即便遴選精細兵快密往楓嶺浦城一帶偵探的確消息星速回報隨即轉報本部院軍前以憑調度仍一面多方密探不時報聞毋得刻遲致誤事機慎速慎速

飭杭嘉湖金嚴各道府預辦糧料

康熙十三年三月

爲飛飭守禦地方事照得閩省叛變浙境壤聯本部  
院據報隨卽調發漢滿官兵前往衢溫二處扼險堵  
禦外浙省水陸交衝在在宜嚴防合行飛飭防範  
爲此牌仰該道府照牌事理卽便申嚴各屬固守地  
方稽察奸宄嚴行備禦并預行整備一應錢糧草料  
以俟大兵供應毋得缺少遲誤致罹咎咎各宜慎重  
封疆以盡職守勉之慎之



檄飭仁和錢塘二縣嚴行保甲察拏奸宄

四月初四日

爲嚴飭察拏奸宄保衛地方事照得邇來軍書旁午  
民間訛言四起因有不軌奸徒乘機擾動煽黨結謀  
希圖構亂各屬屢經發覺擒拿法處嗟此愚頑自投  
羅網省城爲通會之區五方叢聚譏察尤宜嚴謹合  
亟申飭爲此牌仰該縣照牌事理卽督所屬地方人  
民嚴行保甲一甲之內互相稽查并寺廟庵觀通加  
嚴飭如有來歷不明之人毋得容畱其或出入詭祕  
蹤跡可疑者立刻報官查究倘有徇隱事發之日定  
行連坐治罪該縣一面分遣的役密行巡緝果能捕

獲真正奸細者定加重賞但不得借端生事擾動良  
民該縣務須實心奉行俾奸宄無可潛藏地方共保  
安靖如或因循玩忽虛文塞責軍情重大取咎匪輕

飭各道察拏奸宄

康熙十三年四月

爲密飭察拏奸宄保固地方事照得浙屬山陬水澨  
向來毒易藏奸近日不軌之徒訛言煽動勾黨散創  
屢經發覺今邊圉戒嚴恐有外來奸細潛跡窺摸或  
本地狂徒乘機竊發必須嚴謹查察弭患未萌城池  
庫獄關津隘口皆當留心倍加防護各郡縣司牧之  
官固圍衛民責有專屬該道監統一方寔資保障合  
亟申飭爲此牌仰該道照牌事理即便轉行所屬遍  
諭城市鄉村嚴行保甲各自稽查互相聯絡并寺廟  
庵觀通加督飭凡有外來之人細加盤詰來歷不明

者勿得容畱其或出入詭祕蹤跡可疑者立刻報官  
查究如勾連黨羽聚謀不法者即時舉首擒解倘或  
徇情事發之日定行連坐治罪各該府縣仍分遣的  
役密行巡察如有真正奸宄立速緝拏但不許借端  
生事擾動良民凡城垣頽壞即時修葺倉庫牢獄勿  
致疎虞該道務須實心奉行不時督飭倘有玩不遵  
奉者揭報

題叅如或因循故事虛文塞責貽誤地方各有攸歸慎  
之勿違

檄布政司預給兵丁糧餉

康熙十三年四月

爲預給兵丁糧餉以恤勤勞事照得軍興旁午各標營兵丁調防駐守以衛封疆並皆勞苦本部院憫念各兵皆有父母妻子平時支給額餉止可贍給一身已難兼顧今警備邊圉行者有資裝之費居者有守望之勤推其至情均應體恤本部院一片丹誠無時不痾瘝身切今將通省兵丁不分調汛畱營一體預給糧餉以資飽騰除行各鎮將遵照外合行知照爲此牌仰該司照牌事理即便一體查明給發取領存案彙冊報銷毋致遲誤

檄飭金衢道府備辦糧料安撫居民

康熙十三年四月

爲緊要軍務事照得閩逆叛亂逼近浙壤本部院接

據羽書隨卽會商

撫院  
將軍  
提督

先行調發滿漢官兵星赴衢郡險要地方相機

堵禦又經具疏請

旨撥發大兵接應去後惟是師行糧從刻難遲緩今大兵  
雲集所需糧米草料合亟知照備辦爲此牌仰該道  
府官吏照牌事理卽便動支正項錢糧多加採辦倘  
本地出產不敷亦必遴差幹員分行購買總期支應  
無匱一面將動支錢糧通報查考至於支給數目本

部院見在酌就批行藩司遵照聽候該司移會照數  
給發仍須嚴別派撥曉諭里民倘有百姓驚惶奔竄  
者務須開誠招轉安置得宜勿令失所該道府風具  
裕國嘉謨兼擅匡時偉畧向日山陬底定已見一斑  
今日封疆多事更徵經濟未盡事機總在隨時籌畫  
以期鞏固疆圉將來報績論功本部院必當從優  
題敘超遷榮擢拭目可期慎毋疎誤勉旃勉旃

檄飭溫處道府嚴催大荆邊海整備

康熙十三年四月

爲報明緩視邊工屢催未竣等事准

提督塞

咨開據大荆營叅將左助呈稱前事等因

到本提督據此爲照閩省告變見據飛報有船數千隻剗住閩安鎮又鄭逆帶船停泊三盤而大荆逼近三盤洋面尤爲可虞該汛城垣敵樓道路橋梁與砲架砲蓋船筏等項悉關戰守先經飭催修備至今未見報竣相應亟請飛檄嚴催立限修辦整頓齊集庶戰守有藉等因到本部院准此爲照大荆邊海嚴疆一應城垣敵樓道路橋梁砲架砲蓋等項皆關戰守



急務自應火速併工催趲收拾完固庶可恃以爲一方保障且近日閩省變亂勢切震鄰而海道游魂必來窺犯豈可怠緩遲延設有警息官兵藉何堵禦合行嚴飭亟催爲此牌仰該道府照牌事理卽將大荆一帶詳議應修城垣敵樓道路橋梁砲架砲蓋船筏等項立督該縣印官親身料理併力完工毋再推諉微官致誤事機倘仍悠忽遲誤卽行揭報定行

題叅不恕速速

獎勵寧紹道府廳縣

康熙十三年四月

爲特申獎勵以昭激勸事照得浙省瀕海巖疆自奉旨招撫蒞寇歸誠之後數年以來四境敕寧乃今閩逆鴟張逼臨浙境結聯海寇圖擾沿邊此忠臣義士誓切同仇盡忠報

國之時也有能繕治器具修葺城垣鼓舞兵民措置周備者其實心實政誠可嘉尚查該道府廳縣官捐貲購買硝磺配製火藥修葺城門城樓置辦砲車砲房以及綿簾箭簾一切守禦器具無不完備使荒殘郡邑有所恃以無恐其忠勤之効已表見一斑矣至若

拊循兵民籌畫戰守因時制宜真海疆之能吏應變  
之長才雖

王事靡盬分所宜然而壯猷碩畫地方攸賴惟冀益展  
謀猷同心共濟保固疆圉平成之日本部院自當特  
疏

題敘行將超遷榮秩報績酬庸合先獎勵爲此牌仰該  
道府廳縣遵照一體更加勗勉共建豐功

檄飭驛道整理夫船馬匹

康熙十三年四月

爲軍務事照得江南滿兵奉

命應援浙江已經振旅起行不日抵浙一應上江下河船隻  
絳夫亟當早爲備辦庶不臨期有誤合行知照爲此牌仰該道照牌事理卽將下河自平望入境以抵省城又自江干以至衢郡一應絳夫船隻遴委幹員速爲料理聽候大兵經臨應用毋許缺少遲誤但查縣驛額設人夫有限勢必僱募充數貧民應役先期守候關閉公所若行之不善未免飢寒困苦該道更當體恤民隱務須籌酌良法措置得宜旣不有誤軍

務又不貽累小民方爲妥便再如船隻守候裝兵各  
有人口亦當酌給口糧其自省城以至嘉興平望各  
驛已經另檄撥備馬匹伺候今查原任台巡道有馬  
騾四匹逆藩下丁崇有馬騾三匹相應酌發緊要驛  
遞應差其餘各驛應添馬匹速爲購辦仍飭驛官夫  
頭上緊喂養廪壯毋許侵冒有誤軍機定行挨查立  
按軍法從事決不輕恕慎速

檄行布政司酌議軍需

康熙十三年五月

爲酌議軍需以恤民力事照得大兵征勦供億浩繁一應派辦督催皆屬該司專責該司才畧優長本部院凡據申詳不復中制良因軍需緊急寧使儲備有餘但就見在兵馬之數以一萬五千匹計算每月約需豆四萬石八箇月應三十二萬石每月約需草一百萬束八箇月應八百萬束至於杭衢兩處駐牧進勦計四馬一槽一鎗一桶每處各約三千有餘鍋數減半每處約一千五百有餘今所派太多未必一時齊集徒致地方驚擾况已發銀外地買豆卽有續到

大兵可以支給其草束雖因就近辦運而金嚴二府  
出產原少省城駐牧不過暫時亦應并運衢州接濟  
至處州素稱瘠苦今賊氛已逼四邑人民震驚溫屬  
僅存三邑俱係兵衝衛屬惟有西龍二邑又當孔道  
此三郡派辦軍需徒有空文無裨實事不如槩行蠲  
免尚可撫慰民心寧台二郡既無兵馬添防又不便  
遠令解運派數雖少亦屬勞民本部院再四籌畫杭  
嘉湖紹四府豆先解十分之六草先解十分之四槽  
鋤桶先解十分之五鍋先解十分之三金嚴二府豆  
先解十分之四草先解十分之六槽鋤桶先解十分

之五鍋先解十分之三衢州量派先解草八十萬束  
槽鋤桶各五百副鍋三百隻溫處各量派先解穀一  
萬石草十萬束槽鋤桶各三百副鍋各一百隻似於  
見在兵馬支給已敷至於各項價值該司卽行該縣  
照時值申詳出示曉諭莠豆穀一石准條銀若干草  
一束准條銀若干槽鋤鍋桶一一定價如有輸納者  
立時填定銀數給與串票毋得稽遲虧短惟恐照本  
部院約計之數其中尚有應酌者合行查議爲此牌  
仰該司照牌事理卽將本部院酌派前項料草槽鋤  
等項并其中尚有應酌事宜逐一妥確議定通詳以



憑定奪慎速

檄查勒收豆草使費

康熙十三年六月

爲嚴查勒收豆草使費以甦民困事照得兵馬駐衛  
豆草爲軍中必需是以令各府動支正項錢糧買備  
運濟一經解到自應隨到隨收豆必照數平斛草期  
足斤而止夫何里民竭盡心力不憚險遠運解至衛  
訪問各旗悍卒使費不到並不發檔支收致使小民  
坐食守候更且百般刁指草每束索使費銀二釐  
豆每石索使費銀五分又故嫌草束不堪每三束  
并爲一束甚至借名豆草已足強勒折價草每束  
折銀一分入釐豆每石折銀入錢稍不遂意率棍

兇駁嗟此異鄉貧民何堪當此橫索悖違

國法擾累良民莫此爲甚合行嚴查禁革爲此牌仰該同知照牌事理卽查各屬解到豆草米糧因何不官收官放乃容旗丁與里民對支以致橫索使費強勒折乾該同知身膺收支之任不爲禁阻所司何事限文到卽日查明有無勒索情弊具文據實回覆以憑會同

平南將軍出示禁革嗣後遇有各屬解到豆草務須隨到隨卽收明出給批收給發里民回籍各旗應需糧米料草查明清檔支放不許兵民面交尤不許借

端通勒使費敢再悖違

功令擾累解役里民本部院卽時據實

題叅必不輕恕凜遵毋忽

檄布政司驛糧二道趙運軍需

康熙十三年八月

爲設法趙運以濟緊急軍需事照得滿漢大兵進勦閩逆雲集衢州日支糧料係計口按數授食之需但地居上游惟恃省城解運源源接濟數月以來該司報解之數似覺有餘陸續至衢之糧竟不敷用屢據各旗營嗷嗷控領有缺至十餘日者有缺至二十餘日者本部院差檄頻催不遺餘力惟見沿途運解寥寥數艘盼望後運並無片帆衢州司餉各官日事攢眉仰屋燕策該司道遠居省會漠然不理今缺乏日甚一日則士馬飢餓堪虞矧和碩

康親王總統大兵不日臨衛將來糧料更多設有遲誤  
關係匪輕本部院再四圖維特立以號船趲運之法  
先經飭行外合再條列申明爲此牌仰該司道照牌  
事理即便查照後開各條將運糧船隻編號稽查管  
押催趲各事宜悉心料理作速奉行完備具文詳報  
如再推諉遲延漫不經理玩誤軍需之咎自難爲該  
司道寬也凜之慎之至緊至速

一查駐衛兵馬每日需料豆一千三百餘石月該四  
萬石食米日需二百石月該六千石此見在應需  
之數而將來

王師需用尚不與焉卽以見在計之自應陸續解運  
定限三次起行每次解豆一萬石米二千石不  
許顆粒缺少

一衢州居浙上游溪河一帶非船莫渡如杭州以至  
嚴州河寬水深大中船隻可以行使應備大漁航  
以及驛站等船九十隻每隻可載一百五六十石  
者連泊江干分爲三運以省擁擠耽延每運分編  
天地人三號上列小旗一面書衢州運糧船隻字  
樣沿途不得停畱片刻到嚴州交卸定限六日往  
回如遲卽以違誤軍需嚴加查究

一自嚴至衢灘高水淺應設立江山小校等船四百隻每隻可裝二三十石者連泊嚴州馬頭亦分爲三運以免擁擠耽延每運分編智仁勇三號上列小旗書衢州運糧船隻字樣沿途不得停留片刻到衢州交卸亦定限六日往回如遲卽行嚴加挨究

一船隻往還若不設官統領帶役管押不無潛逃規避今自杭至嚴專委杭州府通判許天榮沿途統管自嚴至衢專委才能廳官一員沿途統管每運時除解官外另委雜職一員協管每五船於司



府廳縣各役內撥殷實者一名分押徃回催趲如有遲誤及船隻脫逃官以玩誤軍需

題叅役以軍法從事不貸仍將自嚴至衛委用廳官職名呈報查考

一船戶水手原係趁食糊口之人若不給發工價口糧必致苦累且必脫逃應公平議定照船隻大小酌給口食工價大船一隻每月約給銀六兩江山船一隻每月約給銀三兩梭船一隻每月約給銀一兩五錢此項銀兩酌議停妥俱交與該管廳官當面給發令得實受不得聽衙役埠頭指畱短少

至於押船人役亦應酌量給發鹽菜食米每處先發銀一千兩以備支用如有冒破侵扣等弊定行叅究

一船隻載糧既重船戶水手無多必須沿途相幫扯拽庶能遄往今前項運糧船隻到各該地方該縣驛官於大船每隻立撥緯夫三名大船每隻立撥緯夫二名江山船及小船每隻立撥緯夫一名相幫輓拽遇有水淺灘高之處船隻難行各該地方官多備竹簰起剝毋得推諉遲延違者立行

題叅

一設各船專供裝運糧料無論文武衙門別項差使  
一槩不許封拏借用敢有故違即將封拏借用官  
職名呈報立即叅處不貸

一運載糧料若不稽查數目恐有沿途盜賣情弊關  
係非小着令統管通判及所委廳官於起運之時  
帶原斛四隻自省至嚴糧道稽查盤驗自嚴至衢  
衢州府稽查盤驗若有缺少按數呈報以憑叅拏  
一解運糧料各船既編天地人及智仁勇等字仍以  
每十號起至十號止着令各船戶互相保結取具  
互結存案如有一號潛避責令九船賠補仍將此

船應運糧料帶運至於沿途務須無分晝夜風雨  
星飛前進兼程馳輓經過各該地方嚴行督催毋  
使逗遛時刻遲延寸晷敢有延挨該地方官卽刻  
通報查考仍於起行之日填給運官時日限單自  
杭至嚴報糧儲道查核自嚴至衢報金衢道衢州  
府查核其督押官役及船戶人等敢有延誤情弊  
卽按軍法懲治重則叅拏不恕

一 搜覓各船務期足數其在嚴江山小梭等船四百  
隻除行衢州府僱覓一百五十隻並委差官役其  
餘二百五十隻該司道及糧道星速分覓無論村

河僻港及在江南徽州地方各船嚴行搜取至於  
省泊大船九十隻亦卽分投搜取務期足用不得  
缺少遲誤

以上事宜該司道務須實力奉行作速料理先將分  
運船號官役押解姓名造冊呈報查核如再仍前漠  
視遲延致誤軍需咎有攸歸至在事各官若事平糧  
完勤勞有功定行特疏從優

題敘該司道通加勸勉至和碩

康親王總統大兵應需糧料前項所設船隻尚慮不敷  
該司道再行酌議詳報

飭杭州知府查解兵廝騷擾浙西鄉村

康熙十四年三月

爲嚴禁兵丁損壞山花荒廢農業以重

國本事照得浙西民俗半資耕種半藉蠶桑當此春暮  
夏初正民間婦子齊力蠶繰之時又如山區沃壤所  
產茶笋小民一年家計全望此際收成不惟播種有  
本卽辦課完糧亦於此是賴歷來蠶卯之時正供錢  
糧尚且暫寬徵比以免紛擾乃訪聞旗營兵廝往往  
三五成羣打柴打草遍往鄉村離城漸遠肆志橫行  
或索飲食或詐銀錢或踐山花或奪茶笋稍不遂意  
生變尋非無所不爲甚至荒村僻徑搜括搶奪孤客

難行商販聚足釐纒失時民情困苦殊非法紀除咨  
將軍嚴禁外合行知照爲此牌仰該府官吏照牌事  
理畱心禁飭各宜恪遵軍紀與民相安不得騷擾鄉  
村荒廢農業以及恃強搶奪致干

國典倘有仍前橫行許附近里甲居民協同扭稟該府  
查明申解以憑嚴加重究

檄溫處道嚴禁掠販難民子女

康熙十四年閏五月

爲嚴拏奸棍掠販難民子女以肅法紀事照得處郡人民慘遭閭逆寇亂盡皆攜妻挈子逃竄山林潛藏僻地官兵進剿所有獲帶者本部院見在嚴飭清查給還但訪聞有一種奸棍嗜利無良陰瞞出征官兵擄回婦女可以掠販爲娼公然懷資奔聚擇人賈易名曰販捐本部院向經出示省城禁飭訪拏業已斂跡今聞猶有杭紹金蘭永康等處棍徒仍復相率潛往處郡倚仗營勢結黨成羣隨營販買人口由山徑小路先趕回家且假冒營兵乘勢搶掠殊可痛恨合



行嚴飭查拏爲此牌仰該道照牌事理卽查所屬地方如有前項奸棍或充營兵或充商販設計掠販難民婦女者立即察訪嚴拏重懲枷示依律定罪詳報本部院核奪此係懲奸除害免致婦女遠離難以查給該道務在力行毋得視爲虛文漠無體察致有未便

飭按察司嚴肅秋闈

康熙十四年七月

爲申飭秋闈倍宜嚴肅以光

大典事照得

朝廷設科取士掄選真才比及三年人思脫穎糊名分授之法不爲不嚴近年部頒條教不啻諄切當斯任者自能凜遵第今賊寇交訐四方多事如秦楚江粵各省用兵之地俱議停止獨浙省當此羽檄交馳之際照例舉行良以人文宿著雖處金革不廢詩書

聖朝文教覃敷藉此作養儒修鼓舞向化是今歲鄉試校之往年爲尤重今藩司府縣正印等官切以軍需地

方關係重大不能分身趨事以該司練習精詳寄以  
監臨之任一應場務責有攸歸至於分枝各官借材  
鄰省江浙一水聲氣素通防微別嫌更宜嚴誌本部  
院雖在軍中鞭長莫及誠恐以時值軍興諸務草率  
弊竇叢生士論稍有不孚鉅典何以克副合亟申飭  
爲此牌仰該司照牌事理查照

部頒科場條例實在力行內外事務及聘至簾官務  
須加意防閑盡釐積弊該司身在監臨更當振作風  
裁肅清法紀告誡執事大小員役恪遵憲典使撤棘  
之後得人交慶與有榮施倘以此舉視爲具文潦草

告竣致啓弊端本部院一有所聞卽當指名

題叅從重鞫究勿謂本部院越俎多事也勉之慎之

飭金衢溫處嚴台各道府撫集流亡

康熙十四年十月

爲申嚴恢復郡縣及時撫集流亡以培邦本事照得  
閩逆叛變以來地方不逞之徒糾集亡命乘機劫掠  
擾累地方凡我良民受其荼毒流離慘苦不忍見聞  
今大兵進剿漸次恢復其如兵燹之後哀鴻未集田  
地拋荒非盡力撫綏何以起瘡痍而復元氣倘地方  
官稍有怠惰將見有土無民今

皇恩浩蕩視切如傷凡開闢地方着令能員隨軍安撫又  
復動支賑濟停徵舊逋酌寬見餉并嚴禁兵丁姦淫  
搶掠

朝廷如此軫念臣工益當勉勵合卽嚴飭爲此牌仰該道府照牌事理卽便轉行該縣一切民人未曾復業者務必多方招徠安插得所賦稅不得橫徵詞訟不許濫准勸諭開墾禁飭詐害如有兵丁不法姦淫搶掠擾累地方立即指名申報以憑嚴拏究處未盡事宜隨時措置加意整頓使土闢民歸本部院耳目最詳自有鑒衡獎擢倘若罔恤民瘼怠惰偷安定行特疏糾叅斷不徇恕當茲盤根錯節正可具覘才能各宜  
勉慎勿輕視

發銀行府中元薦度陣亡將士

康熙十五年七月

爲薦度陣亡將士事照得衢州自閩逆叛變以來查有各營將士兵丁用命疆場以致身殞雖經本部院隨時恤殮但爲

國捐軀殊爲可憫今七月中元節屆蘭盆之會擬修佛事懺度幽靈合卽知照爲此牌仰該府官吏照牌事理卽將發去銀二十四兩酌擇清淨處所於十三日起至十五日止設立道場三晝夜延請高僧二十四衆宣誦經卷功德追薦陣亡將士以資冥福應需紙劄祭品香燭等項務要鮮明整齊虔誠精潔具文呈

報以憑核奪并候親臨拈香致奠



檄委杭嚴道隨軍招撫

康熙十五年八月

爲專委隨軍招撫事照得耿逆造亂以來荼毒生靈  
已經三載一切被陷人等或因煽誘失節或因迫脅  
陷身撥厥所由情當矜憫今指日蕩平急應招撫以  
全生命案准

吏部咨開進剿地方委令才能官員隨往軍前專司  
撫民事務沿途曉諭招撫等因奉有

俞旨欽遵在案今該道才能夙著諳練機宜合卽特委隨  
軍招撫爲此牌仰該道照牌事理卽便隨同大兵前  
進沿途宣布

朝廷德意設法招徠所到地方速諭士民人等照常迎接  
王駕剃髮歸誠從前罪愆槩置不問如有率衆來歸或  
擒渠納款者多方鼓勵一面具報以憑彙敘錄用該  
道招撫有方定行一併

題敘以酬勞績

飭西安知縣撫輯新復地方

康熙十五年  
年八月

爲知照事照得衛城郊外賊踞三年被害殘黎困苦  
已極今大兵恢復地方急應設法招徠使百姓仍歸  
故土漸登衽席該縣職司民社合亟飭行爲此牌仰  
該縣官吏照牌事理即便躬親踏看凡經失陷處所  
宣布

皇恩設法招撫曉諭士庶卽速來歸從前罪愆槩不追究  
如有原存廬舍照舊安居或已被賊焚燬作何賑卹  
安插逐一措置妥當務使哀鴻漸集田土無荒此目  
前第一要務慎毋泄視卽將奉行緣由報查毋違

飭衢州知府查勘賊遺砲械

康熙十五年八月

爲軍務事照得逆賊敗遁所有得獲大砲器械自應逐一查點明白擡運進城以憑驗用合行知照爲此票仰衢州府官吏照票事理即便委員并撥人夫前往賊營查勘一應遺存砲位器械卽速搬運進城將砲械數目另造清冊報查不得遲違

飭同知楊道泰赴江山縣協辦軍務

康熙十五年八月

爲軍務事照得江山縣已經恢復人心甫定諸事未周且值

王駕新臨大兵雲集該縣雖行委署如撫輯殘黎督催夫役備辦槽鋤船隻安頓官兵駐劄查還難民婦女盤緝奸宄巡守城池諸凡事務誠非一手一足所能辦集該同知素稱敦練合行專委爲此牌仰該同知照牌事理卽刻前赴江山縣凡一應軍前各項事務協力料理目今殘黎作何撫綏糧料作何輓運槽鋤軍需作何備辦人夫船隻作何應付以及地方諸事

俱宜悉心籌畫務使安全更有應行事宜牌內未盡  
開載者一面酌量舉行一面具文星馳報奪著有功  
績自當破格

題敘如或怠玩違錯責有攸歸慎毋泄視

飭江山知縣招撫馬勝家屬

康熙十五年八月

爲特委招撫事照得閩逆叛背乘機附和者實繁有徒

皇恩浩蕩有能悔罪來歸從前罪愆悉行寬宥仍准照依原銜錄用今查馬勝雖未投誠家屬本是無罪誠恐伊等懷疑畏避有辜撫恤合委招撫爲此牌仰該縣官吏照牌事理即便執牌前赴該地方宣諭

皇仁令其星速歸誠槩免前愆不得驚避失所招到馬勝仍當從優錄用該縣招撫有方一併敘擢

飭金華知府乘時招撫

康熙十五年八月

爲乘時招撫以靖地方事照得金郡土賊不過附和  
烏合先因江常各逆未除得借勢肆害今大兵進剿  
直搗仙霞斬關入閩勢同破竹則零星小醜求生無  
路逃竄山隅本部院安集念切廣行招諭合亟知照  
爲此牌仰該府官吏照牌事理卽將發去告示照式  
大書速遞能差曉諭僞衆從前罪愆槩不追究有傾  
心來歸者該府多方鼓勵安插得所仍將投誠緣由  
具報以憑獎賞該府悉心料理務期伏莽漸消根株  
盡淨招撫有方定行敘錄



飭處州知府乘時撫輯

康熙十五年九月

爲亟飭乘時撫民以安地方事照得處屬久罹賊慘  
難民困苦異常今進剿石塘賊衆敗遁所在遺黎亟  
宜多方綏輯及早整頓地方始無忝民牧旬日來不  
見該府籌畫詳報殊屬因循合亟查飭爲此牌仰該  
府官吏照牌事理文到立將所屬地方何處賊衆已  
經潰散何處賊衆尙在負固目今作何剿撫四境難  
民作何招徠安插速據情形一日一報聽候裁奪如  
有緊急機宜專差請示不許發鋪稽遲如再泄視一  
籌莫展定以溺職叅處愼之勉之

飭龍游知縣乘時招撫

康熙十五年九月

爲嚴飭乘時招撫安集殘黎事照得寇亂民逃地方  
荒廢所藉民牧實心任事如該縣南山賊寇王孝張  
子書等負固已久初不過倚藉下洲之賊爲聲援今  
巨寇敗遁瓦解該縣自當乘時招撫并地方失業難  
民加意綏來以示軫恤旬餘不見該縣籌畫詳請殊  
屬玩違合行查飭爲此牌仰該縣官吏照牌事理卽  
便乘勝勦撫以靖伏莽仍將地方情形一日一報如  
緊急事宜專差請示不得鋪遞稽遲倘泄視軍機撫  
綏無術定以溺職叅處愼速

飭湯溪知縣乘時招撫

康熙十五年九月

爲嚴飭乘時招撫安集殘黎事照得地方初定若有實心任事之官自能整頓殘疆立致安集查該縣東源西源等處向爲土寇窟穴不時出沒其初不過倚藉閩逆聲勢今各路賊衆敗遁正聞風膽落之時乘此勝勢正可設法招徠并綏輯難民令其復業該縣履任方新亟宜淬礪新礪以覘實效合亟飭行爲此牌仰該縣官吏照牌事理文到卽將該縣地方情形土俗民情畱心體訪現在餘寇作何招撫四鄉難民作何安集逐一籌畫精詳一日一報聽候裁奪毋得

虛文塞責如有緊要事機專差請示不許發餉稽遲  
果能實心愛民銷弭寇盜克著成績本部院定行甄  
拔

題敘慎勿悠忽泄視自貽溺職之咎勉之慎之

飭江山知縣查議給還婦女

康熙十五年九月

爲查議事照得江山浦城一路有賊擄婦女盡係開  
常西安以及江西各處之人案經本部院行令該縣  
查明住址親屬一面酌給養贍一面曉諭認領迄今  
未知領去若干見存多少但其中不無父翁年老貧  
病交纏不能前往識認者或有夫壻逃亡親屬離散  
不知其所往者亦有窮乏陷危資斧莫措力不能裹  
糴認回者是本部院雖懷保合之念而難民終無完  
聚之期合亟行查議爲此牌仰該縣官吏照牌事理  
卽查該縣賊遺婦女自冊報之後曾否有人領去若

下見存若干查明分晰詳報一面移文各縣其未領  
婦女如果親屬貧不能前可否酌給路費卽令親屬  
赴領所需路費應作何支給至見在遺存婦女之外  
有無兵丁地棍仍然藏匿不行舉出者作何查還一  
併酌議具報以憑核奪施行

飭溫處道隨軍整理處屬恢復六縣

康熙十五年九月

爲再請嚴督恢復各縣印佐官員飛催到任事據該道詳稱雲和景寧龍泉慶元松陽遂昌等六縣印佐各員俱不在軍前今大兵已抵龍泉撫綏百姓料理軍需一日難緩伏乞差押各官星赴新任等因到本部院據此除龍泉縣令李經邦現委署江山縣事務其餘各員先經檄行藩司飛催赴任去後今據前因復又批行該司嚴催外爲照處屬土寇負固抗拒不過藉石塘逆賊以爲聲援今大兵攻破石塘直抵龍泉其餘處屬零星孽黨自是聞風披靡但該屬百姓

連年困苦今恢復之後亟應多方撫恤安集懷柔該道隨軍進勦所到地方雖印佐尙未到任其一切整頓事宜自應隨地料理如果實心任事旬月之間自有就緒令再申飭爲此牌仰該道照牌事理卽將大兵所到縣邑凡招徠餘黨鎮撫殘黎與夫軍前一應糧草星速加意料理俟各員到日卽令任事毋得諉誤至一應軍機情形仍不時飛報本部院察奪通勿玩違



檄委金衢道隨軍招撫

康熙十五年九月

爲專委隨軍招撫事照得

王師攻取閩疆指日立見平定一切被難人民向因逆賊煽誘迫脅以致陷身揆其情由所當軫憫案准吏部咨開進剿地方委令才能官員隨往軍前專司撫民事務沿途曉諭招撫等因奉有

俞旨欽遵在案今該道才能夙著諳練機宜合卽特委隨軍撫民爲此牌仰該道照牌事理卽便速赴

親王軍前隨同大兵前進沿途宣布

皇恩暨

親王德意所到地方速諭士民人等照常迎接剃髮歸  
誠從前罪愆桀不追究如有率衆來歸或擒渠納款  
者多方鼓勵一面具報以憑彙敘錄用該道招撫有  
方定行一併

題敘以酬勞績勉旃毋忽

檄委台巡道撫輯溫郡餘寇

康熙十五年九月

爲特委撫輯以靖地方事照得耿逆盡衆犯我疆圉將及三載今

王師兩地進剿下洲石塘相繼掃蕩長驅入閩直抵定寧逆賊滅亡指日可計衢屬各縣悉已恢復本部院現在軍中極力整頓目今負固未下者僅有東甌叛鎮櫻守孤城勢窮力詘若設法招徠必聞風向化乘我勝勢及早收功則浙省全局可清溫處道隨征進剿不遑兼顧本部院統師在衢鞭長莫及該道才畧兼優保固台城紛繁四應足當一面況台溫接壤奚

分畛域合行專委爲此牌仰該道照牌事理即便束裝前往大荆樂清一帶酌量機宜零星餘孽相機招撫流離難民加意綏輯有聞風來歸者酌動官銀鼓勵激賞地方應獨應賑事宜區畫具詳以憑核議并卽招諭叛鎮祖勳彼能悔禍革面悉宥前愆更當特疏

題請其餘附從俱復原職該道顯示此意凡有應行事宜徑行調度其緊要情形不時密報核奪該道受茲專委務實心任事功績昭著本部院當從優

題敘以膺懋賞所有招撫動用銀兩另冊報銷勿違

飭龍泉宣平遂昌各知縣撫綏地方

康熙十五年九月

爲亟飭撫綏地方事照得閩逆構亂侵犯浙疆三年之內被賊難民慘澹湯火今大兵進剿恢復城池然地方殘破哀鴻甫集必良有司全副精神傾心經理方有起色合行申飭爲此牌仰該縣官吏照牌事理卽將該縣人民加意綏輯如戶口流離作何軫恤賑濟未靖餘寇作何解散招安荒蕪田地作何力稽勸耕一應地方事宜從長籌畫應請示者迅速詳奪總期扶救瘡痍培養元氣以盡職守不得因循怠忽致干咎愆先將奉行緣由具報查考毋違

飭開化知縣齎諭招撫程鳳

康熙十五年九月

爲知照事據該縣稟報開化難民饑饉情形并賊首程鳳竊踞玉山緣由到本部院據此除殘黎慘苦已經檄行衢州府酌發庫銀赴開賑濟外所有玉山賊首程鳳合行知照招撫爲此票仰該縣照票事理卽將發來招撫程鳳書一封查收遞差的當人役前往玉山相機撫戢仍將情形具報酌奪

飭江山縣看養廣信難婦候領完聚

康熙十五年九月

爲查議事據該縣申稱遵將已未領去婦女分晰造冊呈報其未領婦女業已移文西常開各縣查令親屬赴領尙有廣信玉山縣難婦數口因彼地賊寇未平難以移關應否解赴憲臺定奪或仍權養在縣或應解衢懇賜知照等因到本部院據此查該縣冊內尙有遂安難婦人口未據聲明作何移明認領已經另檄遂安縣知照查明曉諭外至於廣信玉山難婦該地方旣未恢復難以移關該縣仍應看視給養俟地方平定立行移查明白合卽知照爲此牌仰該縣

官吏照牌事理卽便遵照將廣信玉山未領各婦女  
好生看養俟該地方平復之日移查親屬領回完聚  
毋違



牌給生員盛鼎招撫

康熙十五年九月

爲給牌招撫事照得大兵進剿閩逆聞風遠遁一應  
附從接踵來歸悉安插得所從前迫脅情由槩不追  
究本部院屢頒曉諭在案今據金衢道詳報生員盛  
鼎稟民生困苦願往龍游湯溪二縣南山一帶招撫  
松遂餘氛合行給牌爲此牌仰生員盛鼎遵照即便  
前往湯龍各處山源如楊雄王孝勞雲升張子書周  
裔伯羅騰馬二及餘黨本生曉諭禍福令其率衆投  
誠定行擢用本生招徠有方一體彙敘其脅從人民  
已經剃髮者不得藉端滋擾有負任使

查釋閩省歸浙難民子女

康熙十六年六月

爲查釋被難子女事案照閩省歸浙難民子女五百六十餘名口本部院前因各屬難後遺黎乏費難以遠行且慮土音不同恐有差訛是以差官趙宗文等先後赴閩搬押來衢以便就近給發完聚嗣據衢州府議詳其中有江常開各縣人氏送至衢州復還原籍未免多此往返議令差官於各難民子女內查係江常開人氏先行冊報再添差標官赴清湖接送各縣查收傳令親屬認領隨經檄行知照造冊呈報差官前赴分押在案今各子女已至清湖據稟內中童

雅居多若就清湖分發仍恐土音各別不無錯誤相應仍令送赴軍前一併查給爲此牌仰本官照牌事理卽便馳赴清湖傳知前差伴送標官趙宗文王金鼎錢陳灝等將自閩搬來子女盡行押送赴衢以憑轉發細詢籍貫仍候撥給船隻遞交各縣給親完聚通毋錯誤

飭禁司道府廳州縣差擾

康熙十八年二月

爲嚴禁差擾以肅政體以安民生事照得兩浙軍興以來民勞特甚向因用兵之際諸務孔急地方各官藉口軍需或不免于差提四出今幸底定正培養元氣之時凡有監司臨民之責者咸宜飭已奉公共襄治理然最爲擾民無如差提一事蓋司道之承舍與府縣之快役莫不以承票賞差視爲生意下府落鄉如虎傅翼或藉稱憲件恐嚇鎖拏或妄指重情恣兇撲捉以致坐坊皆有應捕各里分立胥差上下相沿絡繹無定差錢酒食狼藉貪饕鷄犬爲之不寧男婦

望而辟易此輩揚揚自得見事風生不肖之官非惟藉爲爪牙寄爲耳目久之且倚爲心腹資爲呼吸於是線索在手提掇皆靈大則指官營私小則憑威勒詐其視承票差錢飯食常例則又末矣究竟於政事公務毫無補益徒腹百姓之脂膏以充豺虎之吞噬是何厚於衙役而薄於民生厲政養奸莫此爲甚合行通飭嚴禁爲此牌仰該司道府廳州縣官吏嗣後司道各衙門承奉事件止行牌票飭催如有司藐抗玩延據實揭報叅處不得擅差承舍守提滋擾府縣等官一體遵照不許差役下縣至州縣催呼詞訟尤

宐痛革一槩不許擅差拘提如有故違或經訪聞或  
被告發本官從重

題叅差役立拏究贓盡法懲治決不輕貸

飭司道各府嚴禁害民諸弊

康熙十八年十一月

爲嚴禁害民之弊以甦窮黎事照得浙省連歲災傷今年復遭亢旱先據地方官申報俱經批行布政司確勘去後現據詳覆內有竭力補救薄有收成被災分數與蠲免之例未符各縣外其餘被災地方查明分數業已據詳具

題惟是所屬殘黎自用兵以來被賊竊踞地方慘遭殘害兵馬往來處所供應繁苦家無蓋藏室如懸磬此比皆是卽時逢大有尙苦難支乃今復又薄收困苦何堪除另行布政司議詳外因思拯救之方首在革

除害民之事使百姓少一分額外之誅求卽畱一分  
養家之餘地免一項棍蠹之索害卽安一項良善之  
謀生如重加火耗私派濫徵與夫蠹胥索詐保歇叢  
奸地棍株害弁兵騷擾以及濫差濫禁詞訟干連一  
切厲民害政本部院俱經屢次嚴行禁飭在案誠恐  
地方各官陽奉陰違仍踵前弊嗟此災黎益增困苦  
合再嚴檄申禁爲此牌仰該司道府照牌事理卽便  
轉行嚴飭各地方官務須軫念災民益加勉勵廉介  
自持不得絲毫派累嚴束衙役不許一事擾民禁戢  
兵棍嚴革保歇一應從前禁革各弊俱須實在力行



仍將作何矜恤殘黎事宜議詳查奪倘不顧民瘼前  
指弊端有一於此立即揭報定行從重特叅勿爲方  
行舉劾遂置不時科叅之例於不問也至嚴至切

飭各道查訪衙蠹

康熙十八年十一月

爲訪拏衙蠹事照得從來厲政殃民無過於積年衙役蓋其久而成蠹鑽蝕之技旣工蠱媚之術更熟昏庸者漸已入其彀中貪酷者更且資爲羽翼於是磨牙礪吻飛而擇食則軍民不勝其害矣本部院遠駐軍中向以羽檄交馳未遑痛加繩治漸致肆無畏憚叢奸恣弊不肖官吏貓鼠同眠怙惡不改已經屢行申飭嚴禁竝未見該管各官發摘開報豈盡皆奉公守法一蕪千犯者乎總由各官平日通同私暱縱蠹養奸惟恐事發相連甘爲徇庇殊可痛恨况今

功令森嚴蠹害爲重徇縱發覺處分匪輕合行嚴飭查拏  
爲此牌仰該道照牌事理卽將衙門胥役逐一釐剔  
并轉行所屬各官一體遵照立將現在各役內嚴查  
如有積蠹奸胥壞法婪贓致爲弊害者一面嚴查一  
面將款蹟據實呈述申報以憑轉發究處慎勿徇庇  
遲延致經本部院親訪拏究定將該道一併照例  
題叅不貸

飭司道嚴查縱盜諱盜積害

康熙十九年十月

爲嚴飭縱盜諱盜之積害以安地方以信

功令事照得浙西一帶盜賊橫行鄉村市鎮民無安枕行  
旅商賈莫不寒心甚至禁城之內公然肆劫闖闖之  
中剽掠頻聞其餘身藏刀械三五成羣恣行偷竊者  
不勝枚舉究其釀害之由總因地方各官畏懼叅罰  
凡民間具報盜情必勒其改強爲竊不論大劫小偷  
並不責捕追拏反致苛求事主眞盜未獲或先拏失  
主家屬拷訊或重責鄰佑里甲咎其疎虞間有一二  
緝獲眞盜旋即營謀賄放旣顧自己之功名又貪盜

三二一  
賊之賄賂使奸徒窺破底裏尙復何所忌憚無怪乎  
竊盜馴爲強盜小夥結成大夥其間更有身列衣冠  
爲盜爲窩因賭計窮家庭子弟糾夥行劫事敗不究  
似此養癰貽害目中尙有法紀乎除現在訪實從重  
題叅外定例地方失盜固有處分然猶係限年緝獲且  
有擒獲過半免議之條若諱盜不報與積至大盜多  
人及苦累失主者皆係分別革職降級處分尤嚴  
功令炳著何各官不知輕重甘於翫法案盜殃民莫此爲  
甚合行嚴飭爲此牌仰該司道照牌事理卽便轉飭  
該地方各官務宜悉心弭盜加意稽防慎毋仍前疎

誤遇有失劫情事許失主於三日內通赴府縣印捕官及司道各衙門據實具呈該司道立刻飛飭該管官卽日嚴督兵捕限日追緝盜匪賊務在必獲一面通報以憑勒限督緝核實

題報如有威勒事主改強爲竊不緝不究及減報盜數盜賊者立行揭報卽以諱盜叅處如有苛求事主妄拏家屬凌虐者以誣良縱盜糾叅如有已獲大盜而改爲竊賊已得賊証而擅自輕釋者以受賄縱盜叅拏以上情弊或本部院訪查的確或被害失主赴本部院軍前具告核實官則白簡飛叅衙蠹敎保提掇

一并嚴拏盡法痛懲仍專責該司道密行體訪揭報  
倘瞻徇庇護并叅不貸

飭按察司禁止酷刑

康熙二十年二月

爲嚴禁酷刑以恤民命事照得設立刑法用以止暴懲奸所置刑具律文名例內載有尺寸式樣然必真正違條犯罪之人而後加以決責至於夾拶二者兩踝碎骨十指連心自非十惡巨憝人命強盜以及蠹役光棍情罪重大者不得濫用向經欽奉

上諭嚴飭部議申明若將小事及案內干連不應夾訊之人恣意妄夾致死者照例處分

功令煌煌炳如星日孰意近來浙屬各官立心慘刻不論事之巨細曲直正犯干連一經審鞫非拶即夾任情



拷掠不顧民命有立斃於箠楚者推其意不過借嚴  
刑峻罰殘民以逞使人望而膽寒遂可敲脂吸髓婪  
賄無饜誠所謂酷以濟貪者言之不禁切齒痛恨夫  
身在地方皆有子民之義小過則當蒲鞭示辱得情  
亦宜哀矜勿喜柰何視百姓如仇讐假三尺爲刀俎  
忍心如此尙可一日姑容於民上乎更聞彼比錢糧  
輒用番青大板責至數十甚且枷拶押追稔惡殃民  
莫此爲甚除真正慘酷劣員現在確訪

題叅拏問外合行嚴示通飭爲此牌仰該司照牌事理  
即便遵照并行所屬嗣後各宜洗心守法痛改前非

審理刑名詞訟務宜分別情罪遵照定式施刑至比  
較錢糧尤不得濫用重板任情枷拶若非十惡大罪  
命盜棍蠹必不容已之事不許濫用夾棍其餘戶婚  
田土國毆細故以及因公株累情可矜原者更不許  
妄加酷虐敢有故違一經發覺斷不容忍心害理之  
酷吏流毒閭閻立即飛章從重特叅爲小民驅除豺  
虎決不如貸

檄杭嘉湖道亟議靖盜安民六條

康熙二十年七月

爲亟議靖盜之法以安民生事照得嘉湖一帶乃平  
川大道江浙通衢商賈行人晝夜不絕兼以村莊聯  
絡雞犬相聞若使司土統兵各官畱心弭盜何致大  
盜公行是處焚劫甚至列械對敵放砲開船目中全  
無官兵究其分立旗號創設渾名盡係土著奸兇竝  
非遠來流賊何難擒剿撲滅自去冬迄今旋散旋起  
日恣日橫各官醉生夢死置諸隔膜若不能制其死  
命者本部院每閱報文不勝切齒往歲東浙叛寇蜂  
起溪山窮谷列寨稱戈尙且掃蕩無遺何有此區區

土賊而敢大膽冥頑動輒嘯聚成羣焚掠村墟驚擾良善況其出沒之處南至仁和交界之軍屯半山北至歸安之含山棟市東至桐鄉之錢王村白馬塘西至德清之下塘村塘橋頭廣袤五六十里之內卽所恃爲窟穴者如大盜嵇二等一夥常屯住於霞岱鰕扒東浜白田頭仰家兜鄭家兜一帶大盜章茂之等一夥常屯住於雙橋蔣菴南陽村錢王村一帶大盜沈文侯等一夥常屯住於莊頭史胡浜書師橋王家間一帶大盜吳五等一夥常屯住於新宅道村一帶而蔓延於隔屬仁和界中來去蹤跡歷歷分明使地

方文武同心協力勤加偵探出其不意不過發兵一  
哨差捕數名立可掩捕渠魁翦其黨羽孰意各官因  
循不振莫展一籌弁兵分汛全無防禦之設施積捕  
勾通反作盜賊之耳目投誠明通線索保甲徒事虛  
文日復一日必致釀成大患本部院遠距上游言念  
及此寢食幾廢故不憚細細察訪臚列數條按本塞  
源務期靖絕除各村互相團甲另檄行知外合亟查  
議爲此牌仰該道照牌及黏單事理卽將開列各款  
逐一細心籌畫

功令森嚴監司責成甚重痛飭所屬共圖殄滅土賊毋累

功名其各款中或有未盡事宜應加斟酌損益總以有裨地方爲主不妨剴切具詳實在見諸施行若仍踵故習苟且因循貽誤民生白簡具在勿謂言之不早也至切

一督飭官兵勒限滅賊杭嘉湖爲浙西重地設立協將弁兵用以彈壓疆圉消弭盜賊邇來巡防備禦之法全不講求以致羣盜毫無畏憚分汛會剿幾同兒戲所謂建威消萌其義安在卽如去冬三府會兵若果實心任事大創示懲翦剔芟除何致復有今日前者取結回覆明係釀盜殃民百喙奚辯今乃尙復逍遙

河上一切勦捕之法未聞作何佈置轉瞬秋盡將冬復將託故回營使蟠結之盜散而再聚流毒無窮言之可恨該道移行督飭目今作何偵探擒勦向聞嘉湖交界五河涇地方形勢四達盜賊往來必經該道親詣相視作何設奇埋伏指授機宜令各官兵扼截擒勦仍一面勒限定期務盡根株具文查考逾限立即指叅事關軍機與尋常盜案疎防迥異各保功名毋貽伊戚

一嚴飭廳官責成緝捕各府設有同知一員專司緝盜地方失事皆其責也土盜如麻焚劫踵告平日不能

消弭竊發又不追捕

朝廷設此專官何用况捕快人等皆屬管轄若能實心督緝按法究比大盜積賊斷難漏網何致官之衙役反爲盜之腹心不能獲盜而償於縱盜溺職殃民莫此爲甚該道嚴行申飭除前檄有名各盜逐一星速密拏必獲一面遴選幹捕分頭設法挨緝務期一賊不遺果能用命立有成效據實具詳官則核明獎勵捕役按名給賞如或株累平民冒功誣盜察出從重題叅嚴拏究處其各縣賊衆屯聚之處確據明白開列手摺密釘星送以備查覽



嚴察捕役通息賄縱各屬應捕人等原爲緝盜而設  
近來勾通線索打成一片大盜來蹤去跡捕役未有  
不燦然於胷中者乃竟按月受賄名爲打月錢及至  
會兵進剿用爲嚮導盜東則引兵而西盜南則引兵  
而北或爲官兵圍困密令散伏民家無所窮詰是捕  
役之奸惡更出羣盜之上殊堪切齒該道嚴飭廳縣  
各官於捕役中密察平日慣通賊線及受月錢者立  
卽密拏從重究治庶懲一儆百使盜無所憑藉伎倆  
立窮自不難於翦滅矣

一防範投誠爲賊耳目從前積賊投首蓋以誅不勝誅

特爲免罪安插其實此輩鷹眼難化皆羣盜之知交舊好也名雖投誠暗與關通事所必至故賊衆卽寄耳目於此輩一遇發兵追捕躡影追蹤彼卽傳遞風聲呼吸立應神鬼不覺以故難於弋獲今須嚴飭地方官從前投誠安插今應作何設法稽查防範使不得暗通聲息一有發覺立置重典庶免洩漏事機使賊透逸

一應立賞格以示鼓勵除賊安民要在信賞而後人思用命如地方人有能殺賊或生擒解送者每賊一名應賞銀若干兩姦盜首一名加賞若干兩或賊屯住

某村有一人來報卽免闔村之罪報人賞銀若干兩  
進兵擒捉不許秋毫有犯違者軍法從事

一蠟厥渠魁嘉與自新今各盜皆土著窮兇互相勾煽  
其中保無迫脅誘引失身爲非者若一槩置法殊非  
本部院好生之意該道卽便多出告示各處曉諭如  
盜夥內能將渠魁擒斬來獻不但免其本罪當卽給  
賞收標錄用有能擒斬同夥及首報指引捕獲者俱  
准投誠免死或久窩走線之人能回心首報立功者  
亦准免罪縱有供扳一槩不究若賊現藏某村本村  
不報或被鄰村報知致被官兵搜勦擒獲卽將窩家

盡法重處同村容隱一併究治

檄衛州道府縣愛養衛屬黎民

康熙二十一年七月

爲申飭愛養殘黎稽察奸宄以安地方以盡職業事  
照得衛屬地處上游接連閩江三省岐界最稱要衝  
自遭耿逆變叛旁邑俱罹寇擾鄉村市鎮無不受其  
蹂躪郡城之內官兵雲集士民星散斯時本部院聞  
警疾馳統師彈壓躬擐甲冑勦撫兼施幸仗

皇威赫濯將士同心賊氛殄滅第軍興以來兵馬經臨難  
後遺黎疲於奔命本部院設法招徠加意撫綏漸歸  
故土重課桑麻請蠲被寇之錢糧追聚已散之家室  
百般軫恤獲覩昇平則此三衛僅存之赤子皆本部

院奪於虎狼之吻而增於版圖之數者也爲民上者  
宜如何愛養以培元氣今本部院奉

旨班師離衛稍遠惟慮司土各官不恤民艱痼瘼無告疎  
於防範奸宄旋生除經檄行衛協約束官兵料理城  
汛外但安民察奸原係地方官專責合行飭知爲此  
牌仰該道府縣官吏照牌事理即將所屬地方嚴加  
防範用心稽察必期盜息民安奸宄斂跡凡本部院  
在衛興革利弊務須實力遵行恪守罔替民間疾苦  
隨時補救各與安全至該道府縣身在地方尤宜各  
循廉介剔蠹懲奸嚴飭所屬不得縱擾殘黎有負本

部院軫恤拳拳至意各宜慎遵毋忽

李文襄公別錄卷二終

李文襄公別錄卷二

受養黎民

六十一